



Las iniziantas en camischut ner (davontier) culs representants dil cantun Thierry Jeanneret e Hanspeter Brigger, gerau communal Maurus Caffisch, il meinabaghetg Aurel Odermatt ed ils planisaders Daniel Wegmüller e Britta Mal (davos da sen.).

FOTOS A. BEELI

Semover e ballontschar ella Val Bergla

Ils Sportkids Trin han inaugurau igl emprem parc da moviment dil Grischun

DAD AUGUSTIN BEELI / ANR

■ **Ella Val Bergla al pei dil Crap Sogn Barcazi eis ei stau ruasseivel ils davos 20 onns. Quei plaz planiv haveva piars sia funcziun avon 20 onns cul niev center da sport a Trin Mulin. Ussa semida quei definitiv. Dumengia han pign e grond da Trin inaugurau ella Val Bergla igl emprem parc da moviment dil Grischun.** La surfatscha dalla Val Bergla ei circa aschi gronda sco ina piazza da ballapei. Ils da Trin san ch'ei fuva tochen igl onn 1974 in foss natural, ina sort rusosna, davos il Crap Sogn Barcazi. Ei fuva ina zona bletscha che negin duvrava. Quei onn han ins baghegiu la halla da gimnastica e menau en quei liug il material dil scavament per la halla da gimnastica. Dapi lu ei il terren planiv ed il plaz ha fatg 25 onns numerus survetschs allas scolas ed uniuns per gjugs e recreaziun. Cu ins ha inaugurau a Trin Mulin il niev center da sport eis ei puspei vegniu ruasseivel ella Val Bergla. Quei ei semidau questa primavera.

Per tuttas generaziuns

Igl onn vargau ei la cuminonza d'interess Sportkids da Trin semessa alla tscherca d'ina parcella per realisar il project innovativ. Las suprastontas dils Sportkids da Trin, Irene Riesch, Petra Casty, Silvia Capatt, Patricia Spreiter e Martina Frischknecht havevan gudignau il 2016 il premi Sanitas Challenge ella valeta da 20'000 francs. La distincziun naziunala honorescha organizaziuns da voluntaris che s'engaschan pil beinstar d'affons e giuvenils. Las dunnas e mummas giuvnas ein turnadas dalla surdada festiva a Trin

culla finimira da buca duvrar la summa gudignada mo pils Sportkids. «Nus havein vului duvrar quei premi per in project sur tuttas generaziuns, per l'entira populaziun da Trin», ha Petra Casty declarau dumengia en siu cuort plaid. Sia sora Patricia Spreiter ha menau il project «Parc da moviment Trin». Prest sunter il retuorn dalla fiasta cul premi dalla Sanitas enta maun havevan ellas ina emprema garanziaa finanziaria per realisar la visium. Ei dueigi daventar in plaz per tuts, seniors, juniors, pign e grond. La cuminonza d'interess Sportkids Trin s'engascha dapi sia fundaziun per ch'ils affons semovien e sappien imprendier d'encunuscher diversas disciplinas sportivas.

Per realisar in plaz polisportiv cun urdeins ed infrastruttura innovativa han ellas saviu ch'ils 20'000 francs tonschien buc. Era fuva ei buca clar nua che quei plaz dueigi sesanflar. En contact culla suprastonza communal ei il pastget planiv ella Val Bergla semussaus sco pusseivladad. La cooperaziun denter vischnauna ed organisaturas dils Sportkids ei sesviluppada spert. Ils 24 d'october 2017 ha Patricia Spreiter saviu presentar alla radunonza communal il project «parc da moviment». La radunonza ei stada d'accord ed ha approbau in credit da 50'000 francs en favur da quel. «Jeu selegrel nungetg dil success da quei project», ha il gerau Maurus Caffisch sincerau a caschun dall'inauguraziun. Dumengia ha el surpriu officialmein il patronadi e la responsabladad da quei stabiliment niev da Trin. Igl ei la nova attracziun buca mo per Trin. Naven dil parcadi a Porclis contonsch'ins en paucas minutas la Val Bergla ed il parc da moviment. Silla via Hans

Erni che colligia Porclis e Trin Vitg vengnan ins ad entupar questa stad glieud incantada da quei stabiliment che survecha en emprema lingia alla populaziun da Trin, a sia giuventetgna, allas uniuns, seniors e famiglias.

Derasar l'idea da Trin el Grischun

Thierry Jeanneret, menader digl Uffeci cantunal da sport, e Hanspeter Brigger, menader dil program «movement e nutriment» digl Uffeci cantunal da sanadad, ein stai presents dumengia vargada all'inauguraziun. Sco els han getg vala il project da Trin sco pilot per ulteriurs parcs da moviment ch'ins vul scaffir el Grischun. Da maniera semeglionta han ils dus uffecis susteniu dapi il 2012 schinumnai «pumtracks» ch'ins ha baghegiu en 14 loghens dil Grischun. Igl ei pistas dad ir cun velo per trenar coordinaziun, moviment e concentraziun. Da medema maniera duei il parc da moviment daventar in'attracziun. Da principi san ins cumparegliar quel cun in Vita Parcours ch'ins ha entschiet a baghegiar avon 50 onns ell'entira Svizra. El parc da moviment da Trin san pign e grond, junior e senior, trenar. Beinvegnidas ein gruppas, uniuns, scolas, famiglias, persunas singulas. Tut tgi che vul trenar forza, coordinaziun e cundiziun vegn ad apprezzar quei stabiliment niev. Forsa anflan schizun pendularis sin viadi dalla Surselva encounter il Plaun e Cuera temps dad ir regularmein el parc da moviment. Ils pastgets dil parc da moviment ein actualmein aunc vidlunder da crescer. Perquei ein quellas surfatschas verdas serradas. Ils urdeins san ins denton duvrar dapi dumengia vargada.



Las suprastontas dils Sportkids Trin ein satisfatgas dil resultat: Irene Riesch, Patricia Spreiter, Petra Casty, Silvia Capatt e Martina Frischknecht (da sen.).



Il biatlonist Serafin Wiestner e la scolasta da sport Patricia Spreiter sin in dils urdeins per trenar la ballontschar.



Ina seniora ha empruau in dils urdeins per ballontschar, in junior observa il moviment.



Ina marscheicla en fuorma d'ina grossa tretscha ei in dils urdeins ch'ils affons han bugen.



In dils urdeins sin plemas avon ch'ins ha montau e fixau quel el tratsch.



Dumengia han ins saviu duvrar ils urdeins, ils pastgets ein denton aunc serrai e ston verdegia.